

QUÆSTIO MEDICA,

*Quodlibetariis disputationibus manè discutienda in Scholis Medicorum,
die Jovis decimâ-sexâ Novembris 1713.*

M. ARMANDO-JOSEPHO COLLOT,
Doctore Medico, Præside.

An Renum & Vesicæ morbis Diuretica calida ?

I.

HOMO nascendo moritur. Dolor ipsius vitæ comes individuus. Hinc cùm ad vitam unus pateat aditus, ad interitum patent innumeri. In sanguine utriusque causas adesse quis negaverit ? Quandiu sanguis placido donatur motu particulisque homogeneis tum fibrosis, tum serosis conflat, colore purpureo florescit, tamdiu sanitas firma viget, functionesque omnes ritè perficiuntur. Quòd si liquor ille heterogeneis & crassioribus fœtus particulis, jugumque ferre indocilis, solidorum motui obstat, lentius proinde circumagatur, functionum integritate læsâ, quanta morborum omnis generis humano corpori imminet cohors ! Vitiato tam pretioso latice, aut stagnante, mille nascuntur ægritudinum species. Si in cerebro moras trahat, Cephalalgiam, si vasis ruptis extra cancellos abripiatur, Apoplexiam afferet ; pulmones difficilius permeat ? Pleuritidi pulmonumque inflammationi anfas præbebit : jecoris, lienis, & mesenterii anfractus tardigradus subit ? Obstructis undique & compressis vasis hydropes frequentes excitabit : falsedine, crassitie, ostiola vasorum renalium aperit, rodit ? Urinas cruentas reddi, renum ulcera calculosque nasci necessum est : nimium dissolutus & fluidior factus fertur ad renes ? Vesica tunc præ nimia urinæ quantitate magis ac magis ampliata tonum suum amittit & elaterem, nec habet unde urinam expellat foras : hinc tam diræ ac plenæ difficultatis urinæ suppressiones, quibus hominum pars maxima vexatur ut plurimum. Gravibus his affectibus mederi intendis ? Anodyna quibus sanguinis falsedo diluatur adhibeas : Salsa verò acria, aperientia, quin & thermæles & metallicas aquas (quas qui adeunt arthritici redeunt calculosi,) uno verbo, *Diuretica acria calida* memineris nunquam esse præscribenda.

II.

MIRA machinæ humanæ compages : partes in eâ nullæ quæ suum ad elaborationem sanguinis symbolum non conferant. Hæc alimenta in substantiam lacti similem seu chylum convertunt,

illæ chylum attenuando & verberando in sanguinem immutant; aliæ veluti toridem colatoria sanguinem à superfluis liberant. Has inter, renes, ureteres, vesicam & urethram non ultimo loco numerabis. Renum substantia carnosa est & densa, ne debiliior & laxior reddatur assiduâ feri copiosioris accessione: figurâ phaseolum renes exprimunt; hinc & inde siti sunt & gemini ob secernendi liquoris abundantiam: à renibus secretum ad vesicam per ureteres deferitur *serum*: hi duo sunt canales, teretes & oblongi, duplici membranâ contexti; in sanis quidem exiles, in calculosis ampliati pristinum vix unquam resumunt *tonum*. Vesica superflui feri receptaculum globosa est & rotunda triplici membranarum complexu constans: externa & communis peritonæo accepta referenda est; propriarum verò altera crassior & validior expulsionem urinæ promouet; altera verò intima tenuiorque, utpote sensu exquisitiori donata mucò obducitur, ne liquoris mordacitate offendantur. Urina vesicæ capacitate contenta vel pondere vel acrimoniâ molesta, ad voluntatis nutum foràs expellitur per canalem *urethram* dictum. Hic vesicæ collo continuus ad extremum usque colem protenditur. Dum viget harumce partium œconomia, functiones cuique propriæ bellè perficiuntur. Sed heu! Quàm facilis earum à statu naturali recessus! Quàm turbari promptæ! Quàm proclives in vitium! Quot dolorum, Quot cruciatuum parentes existunt!

III.

VARIA fieri noxa in reddendâ urinâ potest. Si guttatim destillet, *Stranguria*; si cum summâ difficultate redditur, *Dysuria*; si prorsus cohibetur, *Ischuria*; si maiori quàm par est quantitate excernitur, *Diabetes* seu Hydrops ad matulam vulgò nuncupatur. Si tortor in vesicâ calculus continetur, urina cum mictionis assiduâ cupiditate difficulter redditur, fitque quoddam veluti stillicidium, sic ut vix cohiberi urina posse videatur: nonnunquam licet cœperit percurrere, mox tota intercipitur, acciditque hoc modo mictio intercisâ. Renibus etiam exulceratis in partem mali venit & vesica, liquoris acrimoniâ lacerata; crispatur enim & spissior evadit, fungi in eâ generantur, minorem proinde liquoris copiam continet, unde sæpè sæpius & cum dolore vehementi ad expulsionem urinæ sollicitatur. In *Gonorrhœis* virulentis *Urethra* canalis semini & urinæ communis exulceratur; hinc crispatis & induratis ipsius fibris ita constringitur, ut urinæ nonnisi difficulter & cum dolore possint foràs excerni. Ad tempus differtur urinarum excretio, ubi calculus ureteribus contentus nephriticos dolores movet atrocissimos, quibus vomitus adjungitur. Lapis quoque in *Urethræ* canali- culo retentus fluxum urinæ eò usque prohibet dum partes relaxatæ magis corpori adventaneo & præternaturali transitum præbuerint. Cùm inflammatio renes & vesicam occupat, retinetur omnis urina;

idem vitium accidit si nimia hujus receptaculi dilatatione deperditus fuerit ipsius *tonus*, concideritque vis *elastica* seu comprimens successu temporis & remediis convenientibus restituenda. Hydropem ad matulam seu lotii profluvium immoderatum (affectum quidem minus molestum, periculi tamen & alæ plenum) renum laxitas infert, sanguinis partiumque omnium colliquatio.

I V.

E Triplici medicamentorum familia quæ eruuntur ad morbos renum & vesicæ profligandos remedia, hæc tanquam specifica apud authores commendantur: *Diuretica quidem acria salsa* illa sunt: at sive è plantarum genere, sive ex animalibus aut mineralibus arte Chymicâ tractatis depromantur, plurimo turgent sale volatili, acri & mordaci; Sanguinis igitur dissolutionem promovent, terrestres particulas ad renes deferendo, organorum mictioni inservientium subvertunt æconomiam actionemque retardant aut corrumpunt. At, inquires, urinam pellunt? præclara sanè verba ab Agyrtis heu nimium ægrotantium damno usurpata: Longè aliter sentiunt artis periti; & verò renes occupat inflammatio, eorum tenduntur fibræ aut vis colatoria præpeditur? Quid à *Diureticis* expectandum, nisi irritationis & crispaturæ fibrarum augmentum? Vis *elastica* vesicæ ab ipsius fibrarum extensione nimia deperdita est? *Diuretica* feri uberius accessione, vesicæ fibras eò usque extendent ut ipsius actio eorum usu nunquam veniat restituenda. Adest ulcus in renibus, pus nullius odoris in urinis redditur, vesica ab humoris acrimoniâ irritata inspissatur & ad excretionem humoris superflui & noxii frequentissimè & cum dolore acerrimo provocatur? Cucullatos & fumivendulos si consulas, in solo Diureticorum usu positam esse totam his morbis medendi rationem audacter affirmare non erubescant. Sed heu! mortem ægrotanti jam præ magnitudine morbi in extremis posito adhibitis incautè talibus remediis accelerabunt. Non minùs vana est & perniciofa *Lithonripticorum* armatura, quibus ficta & adulatoria calculos in renibus aut vesicâ frangendi vis tribuitur: arenulas enim & calculos quos genuerunt, dum foràs expellere observantur, subsidentes in hisce partibus nova materiæ productione & accessione non sine dolore & cruciatu, in immensum augeri nemo artis peritus negaverit.

V.

UNDE ergò renum & vesicæ morborum solatium & medela? Utere remediis blandioribus, *anodynis*, Sanguinis salia diluentibus, verbo dicam, simplicioribus; Medicina enim, cum ad naturam maximè accedat, quò simplicior eò præstantior. Renum inflammatione aut dolore nephritico affectis sanguis primùm è brachio semel & iterùm mittatur, tum saphenam seca, potus sit refrigerans & leniens, ene-

mata injiciantur emollientia, *anodyna*: Balneum instituaturs donec remissior fuerit intemperies, & arenulæ in ureteribus hærentes foras amandentur; contentus in rene calculus ejus est molis ut per ureteres expelli nequeat? de salute conclamatum puta, neque *Nephrotomiam* semel solùm tentatam & periculo plenissimam suadeas. Quin & renum ulcus, licet insanabile, tamen in longum protrahitur vitando acria, diætâ convenienti adhibitâ, usu potuum ex oryzâ, hordeo, amygdalis dulcibus, & seminibus frigidis paratorum, necnon lactis asinini. *Potus tepidus jejunio stomacho affusus calculorum generationem prohibebis*, præsertim si à vinis aperientibus abstinere jubeas ægrotantem. At generatum semel & induratum, & alicujus crassitie contentum in vesica calculum, nonnisi *Lithotomiâ* ritè, magno scilicet apparatu celebratâ curari posse confidas. Procul igitur absint, ut periculosissimæ, aliæ calculorum extrahendorum rationes. Ejuretur imprimis renovata nuper cucullati illius & circumforanci Agyrtæ secandi temeritas, sectoris nota facinoribus, detestata sectis, secandis æternùm detestanda. *Diabetem* sanabis incrassantibus remediis, sanguinis consistentiam restituentibus, renunque fibris *tonum* restituentibus & *elaterem*. In vesicæ inflammatione aut paralyti, in quibus nimis ampliata *tonum* amisit, ut præsentissimum & unicum ferè remedium venæ sectionem pluries celebrare memineris, potiones interim refrigerantes & dolores mitigantes præscribendo. *Cathetere* quoque dexterè in vesicam immisso urina foras extrudatur, partemque affectam proinde exoneret. Quod opus identidem ac reperitis vicibus instituaturs dum suus vesicæ fibris redierit *elater*, *tonusque* restitutus fuerit. *Urethre* obstructionibus adhibeanturs quæcumque partem affectam emollire possunt, ejusque suppurationem valent accelerare. Atque hæc est vèra ac legitima morbos renum & vesicæ sanandi ratio, quam qui sequutus fuerit experieturs securiorem *Diureticorum Calidorum* usu, à quibus tales affectus ingravescent, non debellanturs.

Non ergo Renum & Vesicæ morbis Diuretica calida.

Domini Doctores disputaturi.

M. Hyacinthus - Theodorus
Baron.

M. Joannes Nicolaus de la Hire

è regiâ Scientiarum Academiâ.

M. Antonius Geoffroy.

M. Joannes Franciscus Couturier
rei herbaria Professor.

M. Joannes - Baptista Mongin

Medicus Regis ordinarius.

M. Alexander le François.

M. Antonius de Saint-Yon Me-
dicus Regis ordin. Veteranus.

M. Joannes Robert.

M. Ludovicus Gayant Medicus
Regis ordinarius Veteranus.

Proponebat Parisiis FRANCIS. ANT. LE DRAN Parisinus, Baccal. Medicus.
A. R. S. H. 1713.

Ex Typographia JACOBI QUILLAU, Typ. Jur. Lib. Universitatis, in via
vulgò dicta *Galande*.